

TEN-BUNBUN-LA JƆƆŋ SI ŋMUŋSA

Wii-la si ku ŋaa nuhuobiine

¹ Mi-na JƆƆŋ ŋmuŋse teniŋ deen pipima a tige wii kubala le ne. Wii-la fa he dime bunbun kala ne a keŋ miisiŋ. La nii u yiikoro a keŋ la siaa ma nau a chaasa benu, a keŋ la nisaa ma digu.

² Wii-la si ku ŋaa nuhuobiine, la nau ne a ŋaa u dɔŋsia, a bul u wiaa pipima. Wii-la ne ŋla: Miisi-la si bi dɛɛ. U fa he la Nyimma teen ne a ku lii la teen la nau. Yesu Kirisito ne ŋii. ³ U fa si he la teen ŋii, la na wialiŋ u si ŋaa a nii wialiŋ maa u si bula. Wialiŋ la si na aŋ nii maa, ba ne la bulaa pima, di ma wuo juu la tuɔŋ di la kala keŋ nii-bala. La di la Nyimma Wia ari u Bie Yesu Kirisito keŋ nii-bala ne. Laa che di ma ma keŋ nii-bala ŋii ne. ⁴ Laa che di ma tuɔŋ faasa tɔɛ ne woruŋ, ŋii ne tii la ŋmuŋse wiin deen pipima.

Wia ne keŋ pulumuŋ

⁵ Wialiŋ Wia Bie si dagela a tige Wia le, ba ne ŋla: Wia ne keŋ pulumuŋ. Birimiŋ tuo Wia le.

⁶ Di la ne si la duu keŋ nii-bala aŋ ka laa ŋaa birimiŋ tuɔŋ wiaa, laa nyia ne. La wu-ŋaalaa ari la wu-bulaa kala bi wutitii kene. ⁷ Ama di la ne ŋaa pulumuŋ tuɔŋ wiaa a he pulumuŋ tuɔŋ, ari Wia si he pulumuŋ tuɔŋ ŋii, ŋii-na la di la dɔŋsuŋ tiŋŋaa kala keŋ nii-bala ne. Di la ne ŋaa

ηii, Wia Bie Yesu chaliŋ ma jaŋ chese la wu-bɔŋŋɔɔ kala ta. ⁸ Di la ne si la bi wu-bɔŋŋɔɔ ŋaa, laa nyise la titia ne. La bi wutitii kene. ⁹ Ama di la ne seye ari laa ŋaa wu-bɔŋŋɔɔ a dage la wu-bɔmɔ-la a pi Wia, u jaŋ wuo joŋ la haacheba a chela a chese la wu-bɔŋŋɔɔ kala ta. Wia keŋ wutitii. Ŋii ne tii u jaŋ wuo ŋaa ηii. ¹⁰ Ama di la ne si la bi wu-bɔŋŋɔɔ ŋaa, la keŋ Wia yire wu-nyiaru ne. La bi u niŋ wiaa laa he la tuɔŋ.

2

Kirisito chin la hariŋ a pipela le

¹ Mi biirin, mi ŋmuŋse wiin deen pipima di ma bira si wu-bɔŋŋɔɔ ŋaa, ama di la kuŋ-kala haa ŋaa wu-bɔŋŋɔɔ, la keŋ nuu si chin la hariŋ. U jaŋ sula laala u Nyimma teen. Tuɔ-pul Tiina Yesu Kirisito ne ηii. ² U ne joŋ u miisin a yɔɔ suuŋ la wu-bɔŋŋɔɔ wiaa, di Wia joŋ u baaniŋ ta u fa si kene a tin la wu-bɔŋŋɔɔ wiaa, aŋ joŋ la wu-bɔŋŋɔɔ a chela. La duŋduŋa wu-bɔŋŋɔɔ wiaa dee, dunia kala wu-bɔŋŋɔɔ wiaa ne. ³ Ŋla ne la jaŋ wuo to jin woruŋ ari la jin Wia: Di la ne to wialiŋ kala Wia si dage niaa di baa to, ηii daga ari la sene jin Wia ne. ⁴ Di nuu ne si u jimu, ka u via wialiŋ u si dage niaa di baa to, tiina ŋaa wu-nyiaru ne, u bi wutitii kene. ⁵ Ama nii-la kala sii to u niŋ wiaa, u ne nii-la si sene cho Wia kinkeŋ. Di la ne to u niŋ wiaa ηii, la jaŋ wuo to jin ari la di Wia sene ŋaa kubala ne. ⁶ Nii-la kala si si ba di Wia ŋaa kubala, u

maga di u tiina wu-ŋaalaa nage Yesu Kirisito wu-ŋaalaa ne.

Nialiq sii veŋ pulumuŋ tuoŋ si nage ŋii

⁷ Mi bii-chooloo, wii-la mi sii che mi ŋmuŋsa pima leele, u bi wu-falii kala ŋaa Wia si dagema di maa to, u ŋaa wu-binii-la ma fa si nii buŋbuŋ kala ne. Wu-binii-la ne Wia niŋ wialiq ba si dagema. ⁸ Ama u saa naga ari wu-falii ne mi si ŋmuŋsa pipima, bee wiaa wiŋ deeŋ ku ŋaa wutitii Kirisito miisŋ le ari ma ma miisŋ le. Bua deeŋ le birimiŋ ka lel ne, aŋ ka pulumuŋ ha faasa chaane pir. ⁹ Nii-la kala si si uu veŋ pulumuŋ tuoŋ aŋ bere u doŋo tiina, u ha he birimiŋ tuoŋ ne. ¹⁰ Ama nii-la kala si cho u doŋo tiina, uu veŋ pulumuŋ tuoŋ ne. Wii-kala bira tuo si jaŋ ŋaa u siera tel. ¹¹ Ka nii-la kala si bere u doŋo tiina, u tiina veŋ birimiŋ tuoŋ ne. U bi jiŋ lee-la kala u sii mu. Birimiŋ ŋaa u siaa bi na.

¹² Mi biiriŋ, a tiŋ Yesu wiaa ne Wia joŋ ma wu-boŋŋoo a chema. Ŋii ne tii mi ŋmuŋsa pipima. ¹³ Mi nyimmaba maa, ma jiŋ Nii-la fa si he dime buŋbuŋ kala ne. Ŋii ne tii mi ŋmuŋsa pipima maa. Ma bapuosa maa, ma leele yuo dii Sitaani ne, ŋii ne tii mi ŋmuŋsa pipima maa. Mi biiriŋ, ma ma jiŋ la Nyimma Wia ne, ŋii ne tii mi ŋmuŋsa pipima maa. ¹⁴ Mi kuhiasŋ maa, ma jiŋ Nii-la fa si he dime buŋbuŋ kala ne, ŋii ne tii mi ŋmuŋsa pipima. Ma bapuosa maa, ma ma keŋ doluŋ, Wia niŋ wiaa ma he ma tuoŋ le. Ma leele yuo dii Sitaani ne, ŋii ne tii mi ŋmuŋsa pipima.

15 Ma sí dunia kíaa cho. Nii-la kala si cho dunia kíaa, u bi la Nyimma Wia cho. 16 Ɔ tuotɔɛ wu-ŋaalaa ari Ɔ siŋ wu-chooloo ari kialŋ si Ɔaa niaa bibigisi ba titia ɛ, ba kala bi la Nyimma Wia teen ɛ. Ba Ɔaa dunia kíaa nɛ. 17 Dunia ari kialŋ kala si hɛ dimɛ nuhuobiine cho, ba kala jaŋ dɛɛ. Ama nii-la si Ɔaa wialŋ Wia si cho, u jaŋ kɛŋ miisi-la si bi dɛɛ.

Kirisito diŋdɔŋ-baliŋ

18 Mi biirin, dunia diderin Ɔpaga nɛ. Ma nia ari Kirisito diŋdɔŋ-baliŋ jaŋ Ɔ. Bua deen ɛ Kirisito diŋdɔŋŋɔɔ paala yuge nɛ a Ɔ. Ɔii wiaa, la jima ari dunia diderin Ɔpaga nɛ. 19 Ba lii la tuɔŋ nɛ, ama la di ba fa bi kubala Ɔaa. Di la di ba nɛ fa Ɔaa kubala, ba ma fa ha jaŋ hɛ la tuɔŋ. Ama ba lii la tuɔŋ nɛ di la jiŋ ari la di ba bi kubala Ɔaa. 20 Ama ma-na jiŋ wutitii, bɛɛ wiaa Kirisito joŋ u Diŋ-zɔŋ-la hema ɛ nɛ. 21 U bi naga di mi Ɔmuŋsa pipima a tiŋ ma si bi wutitii-la jiŋ. Ama mi Ɔmuŋsa pipima a tiŋ ma si jiŋ wutitii-la nɛ. Ma ma jima ari wu-nyiari tiina bi wutitii kɛnɛ. 22 Kubɛɛ nɛ saa Ɔaa wu-nyiari tiina? Nii-la si si Yesu dee bi Kirisito Ɔaa, nii-la Wia si liisa, u dee bi wu-nyiari tiina Ɔaa? Nii-la kala saa si via la Tiina Wia ari u Bie, u tiina nɛ Ɔaa Kirisito diŋdɔŋ-baliŋ. 23 Nii-la kala si via Wia Bie, u bi u Nyimma ma jiŋ. Nii-la ma kala si sei Wia Bie, u ma jiŋ u Nyimma nɛ. 24 Má leŋ di wialŋ kala ma si nia buŋbuŋ hɛ ma tuɔŋ a kaa mu. Di wiaa deenba nɛ hɛ ma tuɔŋ a kaa mu, ma di Wia Bie jaŋ Ɔaa kubala a kaa mu. Ma di u Nyimma ma jaŋ Ɔaa kubala a kaa mu. 25 Wii-la Kirisito titia si bula duu jaŋ

ŋaa pila ne ŋla: U si u jaŋ joŋ miisi-la si bi dere a pila.

²⁶ Mi ŋmuŋse wiŋ deen pipima a mu tige nialŋ sii che di ba nyisema le ne. ²⁷ Ama Kirisito joŋ u Diŋ-zoŋ-la hema le ne. Diŋ-zoŋ-la si hema le ŋii a kaa mu, ma bira bi nialŋ doŋsuŋ naga, nialŋ sii che di niaa didageba. U Diŋ-zoŋ-la hema le a dagema wii-kala ne. Wialŋ kala u sii dagema ŋaa wutitiiba ne, wu-nyari dee. Má saa leŋ di ma di Kirisito ŋaa kubala a kaa mu, ari u Diŋ-zoŋ-la si dagema ŋii.

²⁸ Mi biiriŋ, di ma ŋaa ŋii a kaa mu, la jaŋ keŋ nyu-duoŋ chee-la Kirisito si jaŋ miira ko. Hiisiŋ bi jaŋ keŋla di la faa. ²⁹ Ma si jima ari Kirisito ne keŋ wutitii, ma saa jaŋ jiŋ ari nuu-kala si keŋ wutitii, u tiina ŋaa Kirisito bii ne.

3

Wia biiriŋ si nage ŋii

¹ Ma na ŋii la Nyimma Wia si chola. U chola kieli, ŋii ne tii u keŋla yiyire u biiriŋ. Wutitii, la sene ŋaa u biiriŋ ne. Dunia niaa bi Wia jiŋ, ŋii ne tii ba bila ma jiŋ ŋii. ² Mi bii-chooloo, lee la ŋaa Wia biiriŋ ne. Ama Wia ha bi chaasa daga pulle ŋii la si jaŋ nage. Ama wii-la la si jima ne ŋla: Bua-la le Kirisito si jaŋ ko, la ma jaŋ nage u si nage ŋii, bee wiaa la jaŋ nau u si nage ŋii kala. ³ Nii-la kala sii yiele wiŋ deen le, u jaŋ liise u titia wu-boŋ wu-ŋaalaa le, aŋ keŋ u titia pulle duu keŋ tuo-pula, ari Kirisito si keŋ tuo-pula ŋii.

⁴ Nii-la kala si ɲaa wu-bomunɲ, u chei wialɲ Wia si leɲe ba ɲmunɲsa bil nɛ di niaa tuto. Di nuu nɛ ɲaa wu-bonɲ, u chei wialɲ nɛ. ⁵ Ma kala jima ari Kirisito kɔ duu laa la wu-bonɲɲɔɔ ta nɛ. U-na bi wu-bonɲ kala ɲaa. ⁶ Di nuu ari Kirisito nɛ ɲaa kubala, u tiina bi wu-bonɲɲɔɔ ɲaa. Ama nii-la kala ha sɪi ɲaa wu-bonɲɲɔɔ, u tiina bi Kirisito jɲɲ. U siaa ma ha bi u nyunɲ pollo. ⁷ Mi biirinɲ, ma sɪi leɲe di nuu-kala nyisema wiaa deenɲba lɛ. Nii-la kala si ɲaa wutitiiba, u tiina ɲaa tuɔ-pul tiina nɛ, ari Kirisito si ɲaa Tuɔ-pul Tiina ɲii. ⁸ Ama nii-la kala ha sɪi ɲaa wu-bonɲɲɔɔ, u ɲaa Sitaani tiina nɛ. Sitaani ɲaa wu-bonɲɲɔɔ bunɲbunɲ kala nɛ a kaa kɔ ari jiniɲ kala. Wii-la si tii Wia Bie kɔ dunia nɛ ɲla: U kɔ duu chei Sitaani tinɲtinɲaa nɛ. ⁹ Nii-la kala si ɲaa Wia bii-lulii, u tiina bi wu-bonɲɲɔɔ ɲaa, bɛɛ wiaa u laa u wu-ɲaalaa kala nɛ a kaa mu. Wia si ɲaa u Nyimma ɲii, u bi wu-bonɲ wuo ɲiɲaa. ¹⁰ ɲla lɛ nɛ ma janɲ wuo a to jɲɲ Wia biirinɲ ari Sitaani biirinɲ. Nii-la kala si bi wutitiiba ɲaa, koo nii-la kala si bi u donɲɔ tiina cho, u tiina bi Wia bii ɲaa.

Má cho donɲɔ

¹¹ Wii-la ma si nia bunɲbunɲ kala nɛ ɲla: U maga di ma cho donɲɔ. ¹² U bi maga di la nage Keenɲ. U fa ɲaa Sitaani tiina nɛ a kpu u ɲaana. Bɛɛ nɛ tii u kpuu? Keenɲ faa ɲaa wu-bonɲɲɔɔ nɛ, aɲ ka u ɲaana fa ɲiɲaa wu-zonɲɲɔɔ. ɲii nɛ tii u kpuu. ¹³ Mi naanɲbiirinɲ, ma sɪi leɲe duu ɲaa wu-kpunɲkpere ma lɛ di dunia niaa nɛ berɛma. ¹⁴ La-na cho la donɲsunɲ tinɲaa nɛ. ɲii nɛ tii la

jin ari la lii suun bua le ne a ken miisi-la si bi dɛɛ. Nii-la kala si bi niaa cho ha he suun bua le ne. ¹⁵ Nii-la kala si bere u doŋo tiina, u ŋaa ni-kpuuru ne. Miisi-la si bi diderij kene, ma jima ari ni-kpuura buu kene. ¹⁶ Kirisito jon u miisij yoo suun la wiaa, a dagela nii u si chola kinken. La ma saa maga di la ma cho la doŋsun tinŋaa nii ne a jon la miisij a yoo suun ba wiaa. ¹⁷ Di nuu ne ken kiaa worun an na u doŋo tiina u juu wii a chiche kiaa, ka u ken tuo-heen a bi u nennige fá, ee ne u jan wuo bul duu cho Wia ne? ¹⁸ Mi biirin, ma sí leŋe di la ken niin dunɔɔna cho doŋo. Má leŋ di la to wutitii wonbiin a ŋinaa wu-zoŋo, di la wu-ŋaala-la dage ari la sene cho doŋo ne.

¹⁹ Di la ní ŋaa nii, la jan wuo to nii le jin ari laa to wutitii wonbiin ne a wuo na wiese Wia teen. ²⁰ Di la tuobiinaa ne ha wuo dage ari la cheye ne, la jima ari Wia ne yuga kii la tuobiinaa a jin wii-kala. ²¹ Mi naanbiirin, di la tuobiinaa ne bi daga ari la cheye ne, la jan ken nyu-duon Wia sipaan a wuo na wiese. ²² Nii wiaa, di la ne sul kuŋ-na kala u teen, u jan joŋo pila, bee wiaa laa to wialin u si leŋe ba ŋmuŋsa bil di niaa tuto ne aa ŋaa wialin síi tore u tuoŋ. ²³ U bira dagela di la ŋinaa ŋla ne: Di la laa u Bie Yesu Kirisito wiaa dii a cho doŋo, ari u si dagela nii. ²⁴ Nuuna kala síi to wialin Wia si dagela di laa to, u tiina he Wia teen ne a kaa mu. Wia ma he u teen a kaa mu. ŋla le ne la jan to jin ari Wia he la teen ne: U jon u Din-zoŋ-la hela le ne.

4

Wia Diŋ-zoŋ-la doluŋ si nage ŋii

¹ Mi bii-chooloo, di niaa ne si di ba keŋ doluŋ a wuo bul wiaa, Wia Diŋ-zoŋ-la doluŋ le, ma sí guu laa dii ari baa bul wutitii ne. Má laa sipaaŋ magiseba na ari ba sene keŋ Wia Diŋ-zoŋ-la doluŋ ne aa bul wiaa. Beŋ wiaa nialin si nyia wiaa a bul di baa bul wiaa, Wia Diŋ-zoŋ-la doluŋ le, ba yuga ne a he dunia le. ² Ŋla le ne ma jaŋ to a wuo jin di nuu ne keŋ Wia Diŋ-zoŋ-la doluŋ: Nii-la kala si laa Yesu wiaa dii a sei duu ne ŋaa Kirisito, nii-la Wia si liisa, a bira sei duu ku ŋaa nuhuobiin ne a ku tuu dunia, u tiina ne sene keŋ Wia Diŋ-zoŋ-la doluŋ. ³ Nii-la kala si bi ŋii bula a tige Yesu le, u bi Wia Diŋ-zoŋ-la doluŋ kene. Dol-la u tiina si kene ŋaa Kirisito diŋdoŋ-balin doluŋ ne. Ma nia ari Kirisito diŋdoŋ-balin deen jaŋ ko dunia. U doluŋ ne saa paala he dunia le lele. ⁴ Mi biirin, ma ne ŋaa nialin Wia si tii. Ma ne lele keŋ doluŋ a kii nialin si nyia wiaa a bul di baa bul wiaa, Wia Diŋ-zoŋ-la doluŋ le ne, beŋ wiaa Wia Diŋ-zoŋ-la si hema le ne keŋ doluŋ a kii dol-la dunia niaa si kene. ⁵ Nialin si nyia wiaa a bul di baa bul wiaa, Wia Diŋ-zoŋ-la doluŋ le, ba he dunia nisiŋ le ne a bubul dunia wiaa. Ŋii ne tii dunia niaa jegilee nii ba teen. ⁶ Ama la-na ŋaa nialin Wia si tii ne. Nii-la kala si jin Wia, u tiina ma jegilee nii la teen ne. Nialin ma si bi Wia jin, ba bi la teen jegili. Ŋla le ne la jaŋ wuo to jin wutitii tinŋaa ari wu-nyiaaraa.

Wia si cho niaa ŋii

⁷ Mi bii-chooloo, má leŋ di la cho dɔŋɔ. Di la ne cho dɔŋɔ, u lii Wia teenɛ ne. Nii-la kala si cho niaa ŋaa Wia bii-lulii ne a jiŋ Wia. ⁸ Nii-la ma kala si bi niaa cho, u bi Wia jiŋ, beɛ wiaa chonuŋ ŋaa Wia kuŋ ne. ⁹ Ńla ne Wia dagela ari u si chola: U joŋ u Bii-bala duu ku tuu dunia, di la tou le a keŋ miisi-la si bi deɛ. ¹⁰ Ńla ne chonuŋ nage: U bi naga la ne laa sipaaŋ cho Wia, ama Wia ne laa sipaaŋ chola. U tiŋ u Bie u ku tuu suu la wiaa, di Wia joŋ u baaniŋ ta u fa si kene a tiŋ la haacheba wiaa, a joŋ la haacheba chela. ¹¹ Mi bii-chooloo, Wia si chola ŋii, u maga di la ma cho dɔŋɔ. ¹² Nuu-kala ha bi Wia naa. Di la ne cho dɔŋɔ, Wia he la teenɛ ne a kaa mu. Di u ne he la teenɛ ŋii, la jaŋ cho Wia ari la dɔŋsuŋ tinŋaa kiŋkeŋ.

¹³ U joŋ u Diŋ-zɔŋ-la hela le duu didagela. Ńii le ne la to jiŋ ari la he Wia teenɛ ne, Wia ma he la teenɛ ne a kaa mu. ¹⁴ La titia na a ŋaa siada di Wia ta u Bie duu ku tuu ŋaa dunia niaa Laataara. ¹⁵ Nuu-kala si wuo bul ari Yesu ne ŋaa Wia Bie, Wia he tiina teenɛ ne a kaa mu. U tiina ma he Wia teenɛ ne a kaa mu. ¹⁶ Ńii ne la titia jiŋ a laa dii ari Wia si chola ŋii. Chonuŋ ŋaa Wia kuŋ ne. Nii-la kala si cho Wia ari niaa a kaa mu, u tiina he Wia teenɛ ne a kaa mu. Wia ma he u tiina teenɛ a kaa mu. ¹⁷ Di la ne cho Wia ari niaa kiŋkeŋ, la jaŋ nage ŋii u fa si naga dunia le. Di la ne ŋaa ŋii, la jaŋ keŋ nyu-duoŋ tapulii-la Kirisito si jaŋ dii dunia niaa sariya. ¹⁸ Nii-la si cho Wia ari niaa, u tiina bi fawulluŋ ka fá. Di la ne cho Wia ari niaa kiŋkeŋ, chonula kiri fawulluŋ ta ne. Di la ne haa fá fawulluŋ

ari Wia jaŋ doḡisela, la ha bi Wia ari niaa cho kinkeŋ. ¹⁹ Wia ne laa sipaaŋ chola. Ŋii ne tii la ma wuo cho Wia ari niaa. ²⁰ Di nuu ne si u cho Wia ne aŋ bere u doŋo tiina, u ŋaa wu-nyiaru ne. U si wuo na u doŋo tiina aŋ buu cho, ŋii-na u bi Wia u si bi wuo na ma cho. ²¹ Wia bula pila ari nii-la kala si chou, u maga duu cho u doŋo tiina ma ne.

5

Wia biiriŋ jaŋ keŋ doluŋ a wuo dunia

¹ Nii-la kala si laa dii ari Yesu ne ŋaa Kirisito, nii-la Wia si liisa, u ŋaa Wia bii ne. Nii-la kala ma si cho nuu, u cho nii-la bie ma ne. ² Di la ne cho Wia a tuto wialiŋ u si dagela di la ŋiŋaa, la jaŋ wuo jiŋ ari la ma cho Wia biiriŋ ne. ³ Di la nii to wialiŋ u si dagela di la ŋiŋaa, ŋii jaŋ dage ari la cho Wia ne. U bi hei a pila di la to wiaa deenba, ⁴ bee wiaa Wia bii-lulii kala jaŋ keŋ doluŋ a wuo dunia ari u kiaa kala. La si ŋaa Wia yarida-la ne pila doluŋ deenŋ. ⁵ Kubee ne saa keŋ doluŋ duu wuo dunia ari u kiaa? See nii-la kala si laa dii ari Yesu ne ŋaa Wia Bie.

Kialaa batori si ŋaa Yesu danŋsia

⁶ U-na Yesu Kirisito ne ko dunia. U si he dunia le, u to liiŋ ari chaliŋ kala le ne a lii. Liŋ dunḡuŋa le dee u to. U to chaliŋ ma le ne, bee wiaa ba keŋ liŋ a fou Wii-chuoŋe liŋ. U bira suu, u chaliŋ ma jaase. ⁷ Wia Diŋ-zoŋ-la ŋaa wiaa deenba danŋsia. U-na keŋ wutitii. ⁸ Kiaa batori ne saa ŋaa u danŋsia tiŋŋaa. Wia Diŋ-zoŋ-la ari lii-la ari u chal-la. Ba kala keŋ nii-bala

ne. ⁹ Di nuu ne ŋaa wii siada tiina, la yie sei wii-la ne. Ama di Wia ne ŋaa wii siada tiina, u ne ŋaa siifian wiin a kii nuhuobiine si si wii-la ŋaa wutitii ne. Wia saa ŋaa u Bie siada tiina ne. Wialin kala u si bula a tige u le ŋaa wutitii ne. ¹⁰ Nii-la kala si laa Wia Bie wiaa dii, u tiina jima u tuon le ari wialin Wia si bula a tige u le ŋaa wutitii ne, a ŋaa wiaa deenba danɔsia. Ama nii-la kala si bi Wia laa dii, u keŋ Wia yiyire wunyaruru ne, bee wiaa u bi wii-la u si bula a tige u Bie le laa dii. ¹¹ Wii-la Wia si bula ne ŋla: duu pila miisi-la si bi dere ne. Miisi-la he u Bie teen ne. ¹² Nii-la kala si he Wia Bie teen keŋ miisi-la ne. Nii-la kala ma si bi Wia bile teen he, u ma bi miisi-la kene.

La jaŋ wuo jin ari la keŋ miisi-la si bi dere

¹³ Mi ŋmunɔe wiin deen pipima di ma nialin si laa Wia Bie wiaa dii ma wuo jin ari ma keŋ miisi-la si bi dere ne. ¹⁴ La ma jima ari la ne sul kuŋ-kala Wia teen, la jaŋ wuo keŋ nyu-duon a sul, bee wiaa la jima ari ku-la u si cho duu jonɔ pila, u jaŋ jegile nii la teen. ¹⁵ Di la ne saa jima ari la ne sul kuŋ-kala u teen, u ne yie jegile nii la teen, ŋii-na la ma jima ari u yie jon ku-la la sii che pila ne.

¹⁶ Di nuu-kala ne na u donɔ tiina duu ŋaa wu-bonɔɔ, u maga di tiina sul Wia puu ne di Wia jon u miisin cheu. Mi bul ŋla a tige nialin si ŋaa wu-bomɔ-la le si bi maga di ba suu le ne a tin ba wu-bomɔ-la wiaa. Wu-bonɔɔ donsun he dime. Di nuu ne ŋaaba, u tiina jaŋ suu. Di nuu ne saa ŋaa wu-bonɔɔ deenba, mi bi si di ma sul Wia duu jon u miisin cheu. ¹⁷ Wu-bon kala

ŋ si ŋaa, ŋaa haache ne. Ama wu-bɔŋŋɔɔ ŋaa daban daban ne. Di ŋ ne ŋaa ba dɔŋsuŋ, ŋ bi jaŋ suu a tiŋ ba wiaa.

¹⁸ La jima ari Wia bii-lulii kala bi wu-bɔŋŋɔɔ ŋaa. Wia Bie ne yie bibenu. Sitaani buu wii-kala wuo ŋaa.

¹⁹ La ma jima ari la ŋaa Wia bii-lulia ne. Nikaana-la-na kala si he dunia le he Sitaani nisin le ne.

²⁰ La bira jima ari Wia Bie ne ko a suri la siaa di la wuo jin Wii-titii-la. La di Wii-titii-la ŋaa kubala ne. La di u Bie ma ŋaa kubala, bee wiaa Wia Bie ari Wia ma ŋaa kubala ne. U ne ŋaa Wia titia. U ne joŋ miisi-la si bi dere pila.

²¹ Mi biirin, má liise ma titia vuiaa le.

**Yesu Kiristito Wu-Zongɔɔ (Ghana)
Sisaala-Tumulung NT Ghana**

copyright © 2014 Wycliffe Bible Translators, Inc.

Language: (Sisaala, Tumulung)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 22 Sep 2022 from source
files dated 13 Jun 2022
b3eb8618-120f-5a96-8c1c-1dbc16914330